



孤山先生遺稿

詩

四

早稻田大學附屬
圖書館

寄第
第
第

廣詩文

16
1494
4

出帶許不



和
1494
4



孤山先生遺稿卷之五

數愨子厚著

數將泰記輯

故人幽興在幽齋

七言律

熊府春望應命二首

都門眺望入新晴。春日遲遲麗景生。沃野游絲紫雉
堞。羣山杳靄滿熊城。馬嘶香陌花間去。人度長橋柳
外行。野老不同探勝客。臨流空有獻芹情。

其二

春城無處不芳菲。雨後烟霞欲染衣。洗馬橋邊楊柳
禪。小金峰頂雁鴻歸。東南佳麗臨流水。西北樓臺對
翠微。十里青郊踏將遍。三三五五度斜暉。

寄李子友游玄宅寺

故人幽興在烟霞。擬向東郊弄物華。下馬試行芳艸
上。尋僧遙過白雲涯。磬聲寂寂傳修竹。禪坐悠悠對
落花。應笑城中折腰侶。春來幾日著烏紗。

寄高伊二君游城南赤氏別業

吟賞遙思二仲賢。滿郊芳草綠芊芊。似霧非霧杏花
雨。欲暗未暗楊柳煙。到處祗應挾琴瑟。主人何肯惜
林泉。誰言月俸書生薄。猶自囊中有酒錢。

寄子友訪伊氏巖野草廬

許公到處勝情新。况復和風動野巾。城裏非無行藥
地。山中爲憶採薇人。殺雞爲黍淹三日。送酒携琴會
四隣。再度縱尋溪上路。恐迷桃葉已蓁蓁。

薩州菱大夫赴江都途過草堂喜賦

四牡駢駢行色新。夜來微雨裊輕塵。誰將大國緇衣

貴。還問齋儒陋巷貧。願卸玉鞍淹一日。幸餘春酒在東隣。明年歸路重相過。依舊桃花待故人。

聞元夕後一夕諸君集辛氏有此寄

城中昨夜放春燈。林下今宵興可乘。幽事不關浮世客。賞心何隔遠方朋。月光濯濯初臨柳。風力微微已解冰。詩律如容老夫聽。寄將餘韻入朱繩。

七級瀑

誰擘層巖半壁開。飛泉七級壯觀哉。虹霓飲澗光相射。龍鯉排空鱗欲摧。尺地濛濛五里霧。南山殷殷四

時雷。安能一假天風力。吹作甘霖洒九垓。

寄題南筑清水寺兼呈湛上人

鷲峰何處拂風烟。紺閣朱甍迴翼然。靈蹟遠尋南竺國。古燈遙想大同年。金繩歷歷通華界。玉溜泠泠落柳川。爲道人間病摩詰。時時矯首望西天。

豐城田伯德贈羶羊皮一張余製爲牀褥寢

處頓覺有逸致賦以誌之兼謝其惠

片皮猶勝舊青氈。細毳纖毛軟似綿。月下移牀深夜座。池塘藉草穩春眠。已於散地懸孤角。寧向塵途脅

兩肩聞說古人勞。自鬻何如閑夢。踏蓬巔。
擬王維。敕借岐王九成宮避暑。作
漢主離宮避暑開。梁王駟馬罷朝來。飛樓迴出烟嵐
上。閣道斜通澗水隈。荷氣竹香流錦席。山光樹影落
瑤杯。天家非借南薰美。安得披襟賦快哉。

白藤花

連棚構架駐殘春。長蔓奇葩經雨新。瞥見明星低燦
燦。何來粉蝶簇磷磷。羅裳雲島巫山女。雜佩風斜洛
水神。最是丘園堪可貴。蕭然不引紫街塵。

諸君見過得十四寒

客至衡門暮色殘。一樽聊此罄清歡。雨過蒼石苔文
蝕。烟鎖幽篁翠色寒。三椀新茶醒酒啜。五車畸冊拂
塵看。貧家何物能留客。好是林端月正團。

同前得幽字

六月朔日雨初收。軒車軋軋小巷幽。情境初冥詩似
畫。風波不至屋如舟。蟬移別樹聲猶曳。竹傍疎簾翠
欲流。別有一鄉名作醉。相携好與故人游。
每歲重陽盈師見邀。今歲重陽泐音未至。賦

此促之。

常年九日叩禪扉。今歲重陽隔翠微。黃菊祇應幽處發。白雲空繞上方飛。遠公有酒留誰醉。陶令無絃懶自揮。爲報故人猶健在。休教此會易相違。

寄題宮氏潮鳴館

別莊濱海海潮鳴。浮響泠泠日夜清。吏事閒時諸彥集。幽懷披處一樽傾。江山秀氣流眉睫。蕉竹清風澹世情。渺渺白沙堪可步。何妨逐月醉中行。

謝柳里翁惠朱墨雙池硯

片石雙池地脉分。研來朱墨映窗芸。不論涓水混涇水。只見玄雲接彩雲。滴露點成周易字。籠鵝寫出道經文。那愁囊底無長物。携去登高蹈紫氛。

穆甫文卿見過得十二侵

濛濛苦雨久爲霖。小酌絲君慰寂森。官冷自無公事至。巷窮唯有故人尋。堪將俊句題青竹。欲使幽情託素琴。莫厭吾廬湫隘甚。醉中刺得一鄉深。

和答米府文學江保叔二首

雄藩冠帶自聯翩。儒雅誰如上客賢。授簡梁園曾賦

雪陪筵碣石更談天。一時鞭弭中原會。絕代名聲北
斗躔。莫怪青雲途不滯。門生早已頌三鱣。

其二

幾年簪筆幄帷中。報道恩光日自隆。爲命不須謀野
美。格非何減濟川功。關西夫子推楊震。洛下諸生重
馬融。愧我一官匏繫士。無由咫尺接流風。

和答米府可雲卿二首

聞說侯門客若雲。卽今年少不如君。神鱗豈是池中
物。汗血非同轅下群。賦出何煩玄晏序。才多誰敵士

衡文。論交自古知音寡。敢許彈琴使我聞。

其二

才子青春二十餘。王門早已曳長裾。山中霧豹霜毛
後。海底明珠出蚌初。休道東南無顧陸。誰圖巴蜀有
相如。班荆傾蓋知何日。公雁來鴻莫使疎。

米大夫飯顛石

遠尋竒石拂嵐煙。飯顛山頭得一拳。膚寸雲從牀上
合。數重峯入掌中懸。襄陽太守顛應拜。栗里先生醉
卽眠。對此清幽堪大瘦。知君不啻苦詩篇。

過文卿得十四鹽

一雨庭陰翠色添。偃松修竹絕塵炎。薄官嗟我遊難
屢。高會從它坐易淹。綠蟻泛來桑落酒。金盤貯得水
晶鹽。無端衣上清風灑。回首城頭片月纖。

神水泛舟

小舫隨流十里餘。高歌鼓柁興容與。雜林黃橘金相
似。夾浦丹楓錦不如。鮮味可求漁客艇。新醪欲貫野
人居。雷連未擬回輕棹。蘆荻洲邊月出初。

田伯德自豐州至。初過余廬。君歸期在迤。此

紀喜且述別意。

那知千里忽來尋。小酌聊堪破寂森。腰下雙龍雷煥
劍。匣中流水伯牙琴。況逢美日初傾蓋。好取清風欲
滌襟。別後豐城何處望。天邊紫氣爲君深。

送田伯德歸豐州

此去豐城路不分。遙看紫氣動星文。殘花只合樽前
惜。別鶴寧堪曲裏聞。望斷胡駝河畔草。夢飛天姥嶺
頭雲。何時更掃衡門下。白黍黃雞重對君。

春夢偶成

午影沉沉夢自牽。匡牀曲几對花眠。園中蝴蝶迷莊
 叟。池上芳菲伴惠連。不向九天聽廣樂。卻尋三島挾
 飛仙。覺來猶訝香風起。一鼎清茶隔竹烟。

辛君席上得煙字

高亭幽勝勝林泉。四座踰躑客欲仙。塵網不離王令
 舄。詞場誰著祖生鞭。花間小徑經多雨。竹外隣家隔
 積烟。鶻詠况逢三日近。使人還憶永和年。

送屈大夫赴江都

駢駢四牡向東方。攬勝何妨道路長。辭借鄭卿多潤

色。璧隨趙使倍輝光。琶湖解纜天如水。函谷聽雞月
 似霜。幾處登高催作賦。秋容猶未減重陽。

紅白二菊

菊花開處媚清晨。朶朶叢叢相映新。素豔全欺姑射
 雪。紅光不減武陵春。尊前潦倒餐霞侶。籬畔徘徊踏
 月人。底事折腰求五斗。陶家秋色未全貧。

佐嘉石文學南遊歸路見過得十五刪

遠游歸客叩柴關。為說南中奇絕山。秀色欲浮千里
 外。流泉如咽五絃間。胡床款款邀明月。魯酒徐徐破

旅顏。休怪緣君飛興切。多年夢寐在躋攀。

題佐梔二將菟水爭先圖

菟河春浪捲遙空。十萬軍中有二公。臂上角弓懸却月。腰間長劍拂飛虹。寧將半渡論驂靳。欲待先鳴辨兩雄。餘勇千秋堪可買。障頭猶自起英風。

浴櫟溪溫瀑

帝傾金鼎洒天津。化作溫泉掛碧岫。絕壁雲霞生氣色。一溪花卉駐陽春。冠童樂自閒中得。熊鳥方從浴後伸。絲是倏然添勝具。遊山涉水不辭頻。

中秋後數夕諸君載酒。余適綠江舉網。獲魚數頭歸。乃擊鮮勸酒。遂極一宵之歡云。

舉網澄江晚自歸。何知剝啄在柴扉。呼童膾鯉分銀縷。送酒攜樽見白衣。地似菰蘆堪託隱。客如鷗鳥可忘機。更餘風露中秋興。一片冰輪未減輝。

題蒲葵園二首

城東何處叩幽扃。認得蒲葵一樹青。開徑時容求仲侶。下帷曾講董生經。遠移盤石供仙局。遙攬峰雲入素屏。不道蕭然環堵小。清風朗月爲君停。

其二

愛此牆東一草廬。自移嘉樹傍階除。但教方寸存丘壑。不羨生涯逐釣漁。綠醅釀成浮蟻色。黃庭寫出換鸞書。醉中更有真鄉在。與子優遊欲卜居。

三淵大夫屢折簡見招。賦此奉謝。兼陳鄙情。漆園爲吏愛餘閑。吏事纔休卽掩關。縱使尊中無美祿。由來畫裏有名山。林禽自託榆枋上。海鳥難栖筍簾間。東閣材賢殊不乏。何須更待野夫攀。

送井大年之京

孤帆匹馬弄芳辰。客路山川又日新。赤石浦邊千嶂夕。浪華城畔萬家春。賦成洛帑行應貴。詩滿奚囊自不貧。莫戀異鄉風土美。君家正有倚門人。

辛酉上日余時卧病

東郊淑氣忽相催。更見椒花對酒杯。多病青山仍伏枕。高歌白雪此登臺。功名未擬終軍策。經術深慚賈誼才。聞道陽春多勝事。只今懷抱好誰開。

詠梅

亭亭玉樹水之涯。一夜前村帶雪披。竹外微風香漏

洩。橋邊斜月影參差。封書驛使春堪寄。對酒仙郎興可知。偏恐向來搖落盡。莫教胡笛曲中吹。

竹裏園集憶子騏在江都

竹裏園亭暑未殘。共携杯酒且憑欄。清風忽自湘簾起。積翠□含楚簟寒。一曲狂歌堪自傲。百年交態坐相看。醉來苦憶蘭臺客。何日披襟罄舊歡。

歲杪帆李二子過訪

憐君杯酒此招尋。雨雪開筵竹樹林。一代文章虛屈指。百年湖海共論心。扁舟不啻山陰興。彩筆兼傳郢

國音。爲是年華催過隙。歡留何厭夕陽沉。

黃道符從榮府來過。席上次池匡卿韻。

幸有蓬門似習家。諸君來醉一池涯。忽飛葉縣真人鳥。何羨銀潢使者槎。掃榻同邀清夜月。就籬猶摘小春花。山公酒後多真態。休笑接羅頭上斜。

季夏避暑綠陽田氏

低欄曲檻水煙開。不用層層別起臺。十里清流孫楚枕。一簾涼色本初杯。尊鱸漸覺秋前美。絲竹偏宜月下催。滿浦芰荷堪采采。初衣欲待故人裁。

妙立精舍集應萱君譽招

北學中原幾許年。歸來秋興屬詩篇。同攜泮水青衿客。更醉匡廬白社筵。獅子寶牀連一室。雁王珍果墜諸天。東林初月暗如雪。遮莫鐘聲度暮烟。

擬送在中郎游東國

中郎都雅與誰倫。東道雲山逐望新。筆翰如花添藻麗。驕驄扶醉美風神。夢迷宇嶺藤蘿月。腸斷參河社若春。再會縱尋今夕興。相看恐不昔時身。

湊川懷古二首

南朝一日喪元戎。歎息長城萬里空。但使兵機由閫外。何憂寇盜滿寰中。身無尺鐵軍猶奮。手撫千瘡氣更雄。只有川頭片碣在。不禁雙淚墮秋風。

其二

楠公底事獨賢勞。奔命東西擁鉞旄。矢盡空拳當虎口。身殲七尺附鴻毛。將星一夜乾坤暗。華袞千秋日月高。請看湊川孤壘畔。海潮將起風怒號。

菊池懷古

鎮西開府壓羣雄。奕世威名誰比隆。四海妖氛飛羽

檄一方征伐賜彤弓。出師赤祚多成敗。報國丹心有
始終。不見苦峰鞞岳際。于今鬱勃起茅風。

山口懷古

山陽全盛壓關西。那料蕭牆動鼓聲。事去繁華尋野
老。池荒芳草任耕犁。飛鴻峰下春將晚。玄武祠前日
已低。只有年年桃李發。東風幾度踏成蹊。

送左元翰游崎陽

高橋港口海潮通。忽見孤帆掛碧空。遙跡但隨千里
鶴。單身剩得七絃桐。日峰奇觀生殘夜。瓊浦清吟響

晚風。聞說襄陽春釀好。不知何處醉山翁。

寄題三原妙正寺

梵閣馮陵半紫霄。金繩宛轉繞山腰。峯如鷲首雲邊
起。境似鼇頭海外遙。漸見雪帆生遠霧。將跳紅日照
殘宵。開圖更切孫公興。擬向天台渡石橋。

蒲葵園集次伯潛韻

衡門寂寂一川潯。吏隱茆堂跡自深。葉縣仙鳧雲際
落。漆園狂蝶夢中尋。家童未掃殘花地。塵客何窺五
柳陰。更有冰壺能取醉。清風洒盡故人心。

游玄宅寺

散步春郊不覺遐。更尋蕭院避塵譁。磬聲隱隱生清
晝。鶯語關關至晚霞。詞客芳筵分忍草。老僧禪味在
雲芽。願懸嶺上孤輪月。來照溪邊數樹花。

井大年買琴邀余聽之

圖書冷笑惠施車。更有琴情似伯牙。欲彈流水高山
趣。先瀹風爐石鼎茶。牀前傳響仙禽舞。牀下窺人片
月斜。須臾變作清商調。涼動盆荷朵朵花。

喜晴

二月昏昏雨不晴。忽看天色入清明。家人曝傘承朝
日。隣叟携樽聽早鶯。已見池塘堪藉艸。况添林外欲
然櫻。舞雩風詠行應好。春服縫裁成未成。
翠杜街南白水潯。霏霏微雪洒孤林。忽携剡曲舟中
興。來聽菴家竹裡琴。客自踟躕披鶴氅。人皆語笑似
鸞音。更迎梅杪彎彎月。玉塵冰壺坐夜深。

大魚更答篠子緝

故人踪跡近如何。坦腹東床傲有餘。贅壻滑稽元翫

世潛夫論著自成書。玉簫吹下空中鳳。長鉞彈來海
大魚。更憶雲仙竒絕處。茫茫積水遠樓居。

秋夜琵琶湖泛舟

雨洗湖天送月華。蘆花楓葉點平沙。孤懷迥出冥鴻
上。閑棹遙過烟水涯。白髮老人窺石鏡。錦袍公子弄
琵琶。飄然一葦隨風去。直到明河織女家。

孫見純善網。余向以書乞魚不報。賦此促之。
腐儒餐飯久無魚。遙向西風問釣漁。我徒緣木求何
拙。子已忘筌適有餘。腰下空彈三尺鉞。腹中難致遠

方書。聞說江潭秋已老。紫萼銀膾近何如。

賀松岡翁七十翁精

本朝神典且善羯鼓。

羨君開宴醉烟霞。七十迎春髮未華。杯裡或疑雲母
氣。門前時枉月卿車。曾抽太古三墳秘。自比先生五
柳家。忽爾樓頭衆樂歇。應緣羯鼓獨催花。

弘前山文學敬夫游歷四方來畱都下累日。
井子琴掃林亭招余及文學傾蓋有日。文學
有詩見寄。卒然和答。

有客飄然萬里來。投箋字字五雲開。誰將東海泱泱
氣。傾出長江滾滾才。車轍祗應天下徧。歲華何惜旅
中催。習家池上饒清興。擬與山公一把杯。

蒲葵園集。山文學亦至。二首

籬邊黃菊有餘菲。節後携來叩竹扉。身似儵魚多樂
事。客如鷗鳥息塵機。琴心寫出流泉響。苔座何妨返
景微。欲識陶家秋興好。南山空翠滿人衣。

其二

桂酒華樽林竹邊。諸君那減晉時賢。案間刺得黃庭

帖。石上移來綠綺弦。頭倒接羅山簡醉。腹藏經笥孝
先眠。茫茫塵世何須問。身在蓬瀛萬丈巔。

送人游壹岐

壹岐孤島海雲重。西望帆邊夕日春。問俗近隣箕子
國。釣魚高倚任公峰。大珠如月波間照。靈艸含春雪
裏逢。君自仙遊期汗漫。無緣凡骨遠相從。

重陽前夕陽樓集別諸君

以下二十首係游
崎陽作

風起樓前楓葉斜。同官餞祖駐軒車。南天疎雨隨秋
雁。遠寺鳴鐘送暮鴉。琴酒暫違旬月外。夢魂難伴水

雲涯。但愁別後登高節。獨自他鄉醉菊華。

孤蓬何處候風潮。曲浦深灣夜寂寥。地僻曾無漁戶
稅。年豐自有酒家邀。鱸魚盤上交香橘。楓樹林端半
翠篠。明月前峰秋更好。不妨連宿弄清宵。

島原始見松文學

雄城千雉海西隅。藝苑恩光日自殊。司馬卽今梁上
客。段干原是魯名儒。談飛玉屑才難盡。化洽菁莪德
不孤。此夕何夕高閣上。一樽風月得相俱。

和松文學

與君相見不相疑。誰識新知勝舊知。一葦忽凌鯨海
度。高山時入鳳琴移。心同月下冰壺色。塵似風前玉
樹枝。更有主人能醉客。□□秋興好透遲。

過鸞翔亭

鸞翔亭子昔曾聞。那料杯尊忽對君。九國舟帆窗外
過。二肥山色掌中分。已疑採藥同徐福。何必披圖擬
少文。延眺不堪豪興發。秋空萬里絕纖雲。

上高來峰

我上高來第一峰。飄然雙舄逐仙蹤。松風謾謾頻吹帽。雲氣層層欲盪胸。溟海望來舟似芥。絕巔登盡杖為龍。腰間長劍如秋水。或恐天門紫氣衝。

宿烏鬼村

孤村投宿海人居。烟霧新晴月上初。吐雪蘆花秋瑟瑟。隨風楓葉樹疎疎。濁醪漸近黃花節。晚飯兼供烏鬼魚。我欲前津放舟去。明朝潮候定何如。

阿瑪灣

酒壚何處慰行吟。阿瑪灣頭試一尋。月窟深藏天馬

種。灣東有牧馬霜楓半雜木奴林。漁翁謾說溟南鳥。賈客

來誇海外琛。已極秋空千里目。層樓昏黑醉沉沉。

崎陽客舍

扶桑西極紫溟隈。延眺聊含客裡盃。疊雪波濤鵬際湧。架空樓閣蜃邊開。紅毛遠帥諸蠻至。白雉遙經九譯來。浦上瓊華秋耐折。一輪明月影徘徊。

同前九日與文卿對酌

初來遠客少相知。海舍蕭然對賦詩。十里潮回瓊作浦。重陽酒熟菊盈卮。望開未必登高地。興至非關落

帽時行路隨君身自健。異鄉秋色又何悲。

游崎陽。重陽後一日。真尹伯見邀於望嶽樓。

時諸彦畢至。杯酒交驩。尹伯昆季並列。填篋

可聽。三兒髻齡皆弄文翰。實盛會也。分得流

字。賦紀其事。

峨嵋黛色坐來浮。節後攀躋海上樓。蘋末微風仍落帽。月前行酒更添籌。誰知他席他鄉夕。來會高陽高士遊。莫怪霄間星象動。荀家子弟盡名流。

過松君紀映江樓。得七陽。時余將歸。非無悵

恨。因賦一章。一紀盛會。一述離情。

盈盈江水遠樓長。樓上開筵興未央。桂魄稍知幾望夜。菊花猶未減重陽。冰壺玉麈無塵色。箕踞科頭有醉鄉。莫是高人濯纓處。竹闌干外一滄浪。

時津阻風。是夜登酒樓賞月。

終日風濤阻客舟。風休濤穩月華浮。飛鴻鳴雁漫漫夜。楓葉蘆花瑟瑟秋。不惜十千沽斗酒。好逢三五上高樓。醉來何問鄉關事。□□滄瀛海外洲。

暮過虹松林。林長數里。跨海濱。偃然如虹。白

沙相映實奇觀也。

廿里蒼松遠作林。煙霞一帶海之濔。灣灣虹影非關雨。唧唧風聲似入琴。沙上無塵留鶴跡。樹間流翠滿人襟。縱教前路行難盡。月下何妨曳杖吟。

望玄海

北望玄海海漫漫。九月秋風碧落寒。肥筑舟帆連對馬。扶桑旭日拂三韓。一身欲跨長鯨背。雙腋如生大鳥翰。勃勃壯心飛不止。千鐘美酒醉觀瀾。
對馬一作五島

過龜道哉話舊及亡友永鳳介

十年分手各西東。何意杯尊此夕同。我已二毛生兩鬢。君今一鷲在層空。悲歡可託朱絃上。萍水難論綠酒中。千載廣陵人不見。更將雙淚洒秋風。

函崎

松林十里接城隈。東至函崎遠眺開。海外遙連箕子國。鎮西高擁霸家臺。風帆入浦皆為市。雪浪淘沙盡作堆。
海中右三十里沙洲奇觀也况值清秋桑落日。將歸遠客且銜杯。
筑出名酒

菅公廟

鎮西都府久塵烟。右相祠堂此儼然。誰料邦家昌泰日。猶聞海國左遷年。片心只是思明主。孤憤何曾訴上天。更有松梅遺愛樹。于今蔽芾詠先賢。

宿柳川台勝精舍

柳市南頭接柳川。纔離塵境即蒼烟。華宮寂寂開初地。清梵寥寥度暮天。處士烏巾來就酒。高僧麈尾坐談玄。三人潦倒邀明月。恰在廬溪溪水邊。

歸家

離家只記先初月。歸路偏驚近小春。三徑未荒殘菊

色。孤筇無恙遠遊身。兒童勸酒頻前膝。琴瑟由房笑拂塵。更有蹇驢邀我態。長嘶仰秣似相親。

將赴

京別諸君

以下十七首係乙未東遊作

都門祖席且躊躇。細草新花滿眼初。離日雖纔期一百。公程其奈過千餘。愁邊岐路游絲繚。別後江山信雁疎。多謝諸君能送我。滿囊何句不瓊琚。

抵肥前佐嘉主黃道符家。雨。呂子明見邀得

五微

東風吹雨雨霏霏。柳市南頭踏夕暉。傾蓋初過芳艸

地。振衣同叩落花扉。謝家春色池塘早。郢國歌聲醉後飛。一別江山殊不遠。莫教鴻鯉等閑稀。

榮城呈黃道符。座有瓶花。

薰葭洲畔故人家。春水盈盈遠且斜。詔舊坐經三日雨。惜芳同賞一瓶花。腰間雄劍逢雷煥。絃上高山有伯牙。此本滿囊多寶玉。行行好向路傍誇。

福岡府訪龜道哉南溟堂。時主人新建書院。生徒日進。賦以祝之。

處士聲名倍昔年。重過堂館更輪焉。絃歌晝靜青衿

座。花柳春深絳帳前。鄴下誰能推一鷄。關西早已頌三鱣。近來溟海多風力。待爾扶搖搏九天。

小倉逆旅諸君見過。得八庚。

海館杯尊暫結盟。諸君並轡出豐城。腰間忽合雙龍氣。絃上誰操別鶴聲。入賦江山分麗景。關心花柳映新晴。津人爲我催舟楫。却恐春潮向晚生。

既夕。餘興未盡。遂同諸君過飲春渚翁。翁善詼諧。得十二侵。

客亭餘興夕陽沉。秉燭何妨此地尋。美酒鮮鱗除柳

市。小園幽徑接花林。詎諧語出願先解。綠綺絃鳴坐更深。怪待樓頭殘夜白。前峰吐月滿江潯。

錦帶橋在巖國錦川。川中起石堆三所。五橋相接。橋長各二十餘丈。中間三橋皆不用柱。蓋水勢甚駛。不能安柱也。結構壯偉。實奇觀也。相傳邑先大夫有工思。創造此橋。

五橋連接一川中。結構驚看奪化工。低首羣龍齊飲水。竝翎仙鵲迥橫空。馬卿不用來題柱。列子何須坐待風。堪咲乘輿行小惠。名家自有濟人功。

小方浦買舟渡海。到嚴島天女廟。

一望南天蜃氣消。海中擎出碧岩堯。王沙十里乘明月。瑤閣三重躡紫霄。帝子英靈雲錦瑟。仙郎歌舞木蘭撓。行人不暇登臨久。空捲孤篷候曉潮。

仙郎謂藤實定

抵赤穗城。主赤松大業家。此夜僧文川來會。得十二侵。

何處芳園慰客心。煙霞三月赤城深。十年離索勞魚札。一夕歡娛託鳳琴。頻醉羽觴飛月下。同盟蘭室倚花陰。怪來倏忽玄風起。門外相迎支道林。

浪華訪賴千秋。時盆栽海棠盛開。得五歌。
把酒江亭興若何。溶溶水色遶欄多。忽迎雨後孤輪
月。欲漱潮流萬里波。一見誰知如舊識。三杯休怪發
狂歌。海棠花下挑銀燭。不覺春宵數刻過。

和千秋韻

花柳參差自作樊。春風來叩故人門。一堂琴瑟傳同
調。千古文章入細論。渺渺潮流環曲檻。斜斜月色映
層軒。謝家醉忝饒詩興。堪藉池塘芳艸繁。
訪伯潛諸賢來會。

天涯別後嘆商參。那料良宵乘月尋。腰下青萍輝燭
影。牀頭綠綺託徽音。雲山有駕追嵇呂。花徑無塵引
向禽。綵綵交情論未盡。兼葭洲上曉潮深。

萱君邸舍集得五歌

江南諸彥興如何。此夕高軒載酒過。首夏猶宜曾點
服。殘霞暫映魯陽戈。薰風拂樹餘花墜。明月當樓醉
客多。試向欄前堪一漱。潮流何處不金波。

平壽王宅集。瓶插牡丹盛開。

浪華城畔送芳菲。四月名園興未違。林下酒人嵇叔

夜江南詞客謝玄暉。一枝濃豔猶臨席。數畝莓苔總
映衣。不恨瓊筵春太盡。綠陰深處好禽飛。

浪華城北亭集和荒木士遷韻

待月江頭白玉堂。溶溶一水遠爲鄉。澹雲疎雨朦朧
夜。低唱高歌窈窕章。何處松風傳遠籟。有時荷氣送
餘香。須臾蟾影暗如晝。好引瑤杯對謝莊。

訪中井子慶懷德堂主人昆季子姪聯翩滿
座。

六門桃李滿江東。處士聲名日更隆。洗耳偶過弦誦

地。解頤同醉酒杯中。座逢雷氏雌雄劍。詩見毛家大
小公。別有阿戎堪共語。竹林深處引清風。

青松院集應篠安道招同用一東

一時王謝滿江東。携手橋頭度夕虹。有石徧題黃蘗
偈。無人不醉白蓮宮。松筠迴接千峰翠。躑躅猶含三
月紅。非有茗杯能解渴。何緣雙腋引清風。

詠小大塊

噫氣由來大塊通。誰將尺管代天工。蘆灰頻應黃鐘
律。鳳炭偏宜碧玉筩。班扇幾時悲棄置。楚臺何處送

餘雄。區區孤直君休笑。願獻洪爐既濟功。

攝邱萱君譽乞暇歸藩。枉顧余廬。余與君譽

誼存通家。且十五六年前余東游。屢與君譽

驩。交遊中尤爲親密。別後東西千里。各以爲

恨。今茲相見。悲驩交集。聊賦一律。以伸衷曲。

浪華分手各西東。尺素寥寥少雁鴻。呂駕命來千里

外。孔樽傾盡一宵中。回頭往事多爲夢。屈指交遊半

欲空。雞黍留君君莫厭。故人雙鬢已如蓬。

薩藩菱大夫赴江都。途過弊廬。以役事靡暨。

不得枉顧。留書道故。賦此答謝。情見于詩。

門外麟麟駟馬車。過門不入意何如。路長煙靄千山

外。情溢寒溫數字餘。但道客心爭日月。無由閑步問

樵漁。攬衣欲逐君行遠。徒揖清風獨踟蹰。

謝蓮池鶴元魯見惠磁盃一枚

磁盃新出越窑中。皎潔真成玉雪同。掌上忽擎雲漢

月。樽前徐引竹林風。貧家本自無長物。佳貺何緣及

老翁。幸值春醪發醅日。衰年尚得醉顏紅。

送賀處士赴辟三池

玄纁使者問茅茨。誰識尤良在白眉。牧伯當今求別
駕。故人何必守東陂。驂騑不向鹽車坂。仙鶴欲栖珠
樹枝。隣國相望如咫尺。登樓回首莫傷悲。

次韻高君暮春集辛訓導宅

有友開樽有酒邀。斯交千載未寥寥。琴如聽鶴心何
廓。賦自凌雲氣欲飄。相見偶同今夜飲。半醅猶駐老
顏凋。奈何脚疾難來往。非是君家道路遙。

同前次管生韻

午睡沉沉日欲斜。春遊渺渺烟霞。柳如絲處陶公

宅。草似茵時邵叟車。神會故人皆在眼。夢醒童子獨
煎茶。攔干立盡空回首。愁絕南天歸鳥遐。

送中山生東遊

萬里長風拂玉鞍。臨歧休□路偏難。病痾幾歲廢丘
壑。飛興因君生羽翰。大海狂瀾天地紫。圓嶠積雪古
今寒。莫言千載無良史。司馬當年愛壯觀。

井元衡自南筑始至喜賦

多年相識託魚鴻。晤語何知此夜同。一榻久懸羅壁
上。孤樽忽對草堂中。霏霏幽佩含蘭氣。楚楚青衿引

竹風。白黍黃雞君不厭。十千何必醉新豐。

次韻高君遊專念寺作

行藥城中日欲西。一牛鳴地得禪栖。自緣幽壁成靈境。不向青山躡碧梯。塵遠始憐林竹密。臘高翻笑嶺松低。但將杯酒邀明月。陶令何曾戀虎溪。

浴平山溫泉累日。鹿門左元翰有新詩嘉魚

之惠。賦答謝。

迢迢虛谷梵音稀。剝啄誰知款竹扉。塵金洗時雙鯉至。瑤函披處五雲飛。君唯高調同歌郢。我獨閒心在

浴沂。散步涼天相憶夜。風飄松子落人衣。

賀蒲母孺人七十

二月春風拂玉琴。瑤池仙樂晝沉沉。書傳東海麻姑信。詩見南陔孝子心。慈竹陰臨芳席合。紅萱色映彩衣深。此時王母何辭醉。鳥薦行杯送好音。

賀致事大夫屈翁七十。時令嗣大夫自江都歸。

壽筵開處靄烟霞。七十懸車鬢未華。畫錦還鄉裁五彩。名園種樹著三花。芝蘭漸秀諸孫座。□□齊隨萬

石家莫怪紅顏長不老。盤中自有棗如瓜。

詠金絲烟草

滿囊何物發氤氳。剪取清煙萬縷分。不有洪爐傳伏火。那能輕管出孤雲。僊方本借金光種。瑞氣偏籠碧篆文。休道漢家雞舌貴。笑談猶自帶餘芬。

次韻高助教同僧獨有過和子成

獨詠秋天落月纖。衣襟不覺露華沾。清風此夜思玄度。蓬戶何人候道潛。塵尾定隨林影拂。杯中應待菊芽添。老夫臥病連旬日。安得相携竹裡淹。

雪夜奉迎玉山先生及諸君。時庭梅方發。先生

生乃命亭曰孤山。賦此奉謝。

幽亭小酌此留君。一樹梅花夜轉分。疎影橫窗纖月落。清談促席濁醪醺。詩同水部應無敵。興入孤山自不羣。林表更看暗雪色。還疑野鶴下湖雲。

雪晚孤山亭茗話

幽亭晚興未全孤。茗酌蒲團對石爐。但道百壺澆磊塊。何如三椀鬪清臞。梅邊駐屐人如鶴。雪裏題詩字似珠。四顧蒼茫天一色。却疑移棹向西湖。

琵琶湖

琵琶烟水百川通。處處樓臺畫不工。地折東西開巨

浸。天低眺望入鴻蒙。濤聲夜壯將軍塚。

湖畔有木竹將軍墓

色春深帝女宮。羞殺風塵誤夙志。奔馳無似一漁翁。

夢遊芙蓉

芙蓉頂上上仙都。欲往從之路亦軀。一夜朱翰生兩

腋。飄然飛上天之衢。袖中日月雙丸躍。足下雲霞五

彩敷。覺後牀頭堪自笑。棲棲五斗一腐儒。

同諸君過綠陽田子瑛二首

水映高樓醉色寒。忽移冰簟近鉤欄。渚邊芳芷猶堪採。江底青蓴稍可餐。談起玄風生麈尾。詩成藻思在毫端。扁舟一放乘明月。咫尺蓬瀛路不難。

其二

樓頭詩興落烟波。愛客如君更幾何。但為比來官暇少。偏貪到處勝遊多。拂磯垂柳風纔起。滿浦新荷雨忽過。醉後滄浪堪濯足。俯聽漁父扣舷歌。

文卿宅集得七陽

休論卜築近塵衢。□向園中興自殊。天籟坐聞南郭

几神遊飛入少文圖。生芻一束人如玉。彩筆千行字
是珠。不惜賁然空谷跡。與君來往醉冰壺。

蒲葵園集得十四寒

壺公井畔雪猶殘。馬踏新泥路不難。煖閣迎春連柳
市。芳筵勸醉有辛盤。牆東琴瑟非凡吏。柱下圖書託
散官。不有竹叢栖鳥雀。何緣咫尺隔塵譴。

井大年宅集二首

綠酒青燈此考槃。隱囊蒲席坐相歡。興添一線堪愈
逸。懷及千觴可自寬。深洞梅花春欲洩。满天星斗夜

將闌。誰知雪裏題詩處。字字如珠落筆端。

其二

此夕何夕罄君歡。揮麈開樽倚竹欄。縱飲從他雙耳
熱。交情堪見片心寒。梅催驛使江南信。雪帶扁舟剡
水看。興至無端鐘鼓動。何論長夜更漫漫。

伊大素之京問禮

天朝名公因贈別

孟母金刀機上寒。休辭此去路漫漫。馬從西極飛聲
價。魚向南溟生羽翰。詞賦千章添氣色。鶯花三月入

平安。當時文獻多寥落。誰問周家柱下官。

送馬彥章從駕赴江都二首

肥馬輕裘屬望新。扈遊誰不羨詞臣。吉行緩轡輕千里。逆旅看花醉暮春。襟洒大江同浩蕩。詩題名岳更嶙峋。侯家况有魚鮪美。休向秋風憶紫萁。

其二

詞臣彩筆映千秋。載筆真堪萬里遊。已有從行虞學士。可無侍側薛居州。桃花馬上春佳麗。青翰舟前水穩流。一詠一觴隨處好。不妨長路更悠悠。

壹岐八幡宮應祠官吉野翁之需

神后樓船絕大洋。威靈永此鎮殊方。雞林傳檄降王至。鯨海無波貢路長。四序蘋蘩存舊典。千秋竹帛有餘光。祠官歌頌還堪薦。不啻清齋似大常。

示按摩一宅惠梅

汝自塵埃市井中。梅花安得白兼紅。紅含春色霞堪比。白吐清香雪不同。數遍按摩蘇病客。兩枝光景起詩翁。烏皮幽賞易移日。驢背寒溪難向風。

送山文學還弘前

壯遊才子屬青年。萬里鄉關入夢懸。鳥道斜通三越
嶺。鯨流迤接九夷天。許身不愧南金比。裁賦誰知洛
紙傳。聞說葵臺招駿急。歸來應沐主恩偏。

其二

孤帆遠影拂遙空。有客將歸滄海東。縞帶未酬傾蓋
後。驪歌忽唱把杯中。知音幾處鍾期在。濟勝何人許
掾同。休道關河千萬里。寧無尺素託飛鴻。

苗師自筑前至。示南溟龜君及其弟弁師送
詩二篇。同用一韻。因次其韻送師將歸。兼寄

龜君兄弟

留師不駐思依依。此去天涯何處歸。詩社有緣論色
相。雲遊無意弄芳菲。遠公禪寂虎應狎。蒙叟逍遙鵬
欲飛。為報老夫多臥病。三春獨自掩柴扉。

丈卿遊松橋觀海燈歸談其事。歷歷如在目
境。因同諸君賦。

維昔神燈挾帝舟。猶將餘焰壯千秋。盈盈明月隨潮
湧。燦燦朱霞點浪浮。只恐靈犀驚水府。仍疑巨蜃結
珠樓。知君攬斗捫星地。遙在蓬瀛最上頭。

送神子輿還播州寄懷赤松翁情見于詩。

播陽歸客發舟舩。不啻離情共黯然。爲我欲傳千里信。因君追憶昔遊年。赤松辟穀身何健。黃卷傳家子亦賢。報道故人仍臥病。無由携手度雲煙。

贈井大年并序

井君大年自稱毒公詩魔。作歌自述。蓋謂魔能破拘。毒能攻病。惡世之詩人爲法所拘束。未免疵病。故欲破之攻之也。余謂魔能破拘。魔卽佛。毒能攻病。毒卽藥。何在其爲魔爲毒。

也。苟無拘之可破。無病之可攻。猶且酷虐弗已。所以爲魔爲毒也。余旣喜井君之意。且恐其長往不返也。賦此以贈云。

君愛詩魔與毒公。膏肓地上結盟同。鳩槃變幻誰能測。烏喙瞑眩獨奏功。風刺常存蜂蜜外。詞鋒深匿藕絲中。如今無病還無拘。二豎跳梁恐屬空。

席上次元衡韻

座有知音興自寬。不妨流水入琴彈。雲間才子爲名對。柳下先生託小官。君合層霄輕燕雀。吾唯一室覺

芝蘭陶家幸有秋醪熟。蒲席松窗留客多。

送井元衡赴南鄉山中

拂衣遙向白雲端。竹舍松房對鬱盤。但道山中隨鹿豕。從它世上起波瀾。水經注罷傳奇蹟。樵曲翻來入妙彈。社酒相邀堪一醉。知君不失野翁歡。

山水謠十首

水源山隩遠相尋。烟水雲山一徑深。水上連山迎短棹。山間瀑水灑塵襟。落花泛水流山外。小洞穿山接水潄。水阻山重人籟絕。始知山水有清音。

其二

孤山南畔水西涯。水媚山明接素秋。山籠水氣雲常潤。水泛山光翠欲流。水徑迤連山徑轉。山禽時與水禽游。不用登山浮水去。山屏水帶遠高樓。

其三

水懶褰裳山懶攀。藏山苞水在塵寰。朱絃響合山簫水。粉壁圖來水又山。水菜山穀甘澹泊。山鑪水罐愛清閑。但教水意山情熟。不必青山綠水間。

其四

水遶孤村山遶廬。貪看水綠與山青。時滴水墨圖山
景。或向山窗注水經。水路山蹊宜緩步。山歌水唱入
閑聽。山翁於我情如水。日抱山樽過水亭。
好向山中水際過。春山如笑水如歌。鹿含水草眠山
石。禽蹴山花點水波。水樹陰陰山屋少。山烟漠漠水
田多。山人勸酒臨溪水。奈此山昏水暝何。

其六

山房水閣夜玲瓏。萬水千山夢寐中。瑤水西邊山子

馬。閩山峰上水晶宮。水浮貝闕仙山出。山架虹橋海
水通。月落前山溪水白。何來水鶴舞山風。

其七

水瓶山杖遠相携。徑自山南向水西。雲外暗山圍水
郭。雨餘春水漲山溪。帘飄水店山醪熟。花遶山家水
鳥啼。水若鳴琴山似畫。看山玩水欲雞栖。

其八

別業山門傍水開。山童洒水掃莓苔。池環水檻山公
醉。梅遶山園水部來。山黛水紋堪可掬。水鳧山鷓不

相猜。松蘿掩水山將暝。山月留人滿水隈。

其九

誰道梯山航水難。假山盆水傍闌干。半江水與山雲
剪。九仞山翁水色寒。水月含山生遠意。山風吹水起
微瀾。玉山欲倒懷如水。弱水蓬山醉裏看。

其十

高山流水野人家。山送青嵐水浸霞。水脉通時山井
滿。山崖缺處水簾斜。僧泐澗水歸山寺。雉下山梁飲
水涯。樂水樂山非我事。山耕水耨送年華。

孤山先生遺稿卷之五終

孤山遺稿卷之五

其九

孤山流水野人家
山送青嵐水送霞
六月時時雨
孤山流水野人家
山送青嵐水送霞
六月時時雨

其十

孤山流水野人家
山送青嵐水送霞
六月時時雨
孤山流水野人家
山送青嵐水送霞
六月時時雨

